



Inatsisartunut ilaasortaq Charlotte Pike, Inuit Ataqtigiit

Ittoqqortoormiini mittarfik pillugu § 37 naapertorlugu apeqquteqaammut 2022-028-mut akissut

31-01-2022
Suliap normua: 2022 -
2209
ID. nr. 72411743

Asasara Charlotte Pike

Inatsisartut suleriaasianni § 37 naapertorlugu Ittoqqortoormiini mittarfik pillugu Naalakkersuisunut apeqquteqaateqarputit. Apeqqutitit uannit akineqartussatut innersuunneqarput. Apeqqutitit matuma kinguliani ataasiakkaarlugit allanneqarput, akissummillu malitseqarlutik

Postboks 909
3900 Nuuk
Tlf.: (+299) 34 50 00
E-mail: box909@nanoq.gl
www.naalakkersuisut.gl

Apeqqut 1: Ittoqqortoormiit eqqaani suluusalimmik mittarfiliortoqarnissaanik Naalakkersuisut qanoq pilersaaruteqarpat?

Akissut: Nunap immikkoortuini mittarfinnik tullerriaarinnissamut tunngavissat pillugit Sanaartornermut Ataatsimiititaliap isumaliutissiisutaa Inatsisartut 2020-mi ukiakkut ataatsimiinnerini imm. 27-mi oqaluuserineqartoq, Naalakkersuisut nunap immikkoortuini mittarfissat pillugit sulinerminni aallaavigaat.

Imaappoq, Ittoqqortoormiini suluusalinnut mittarfiliornissaq Naalakkersuisut sulissutigaa.

Apeqqut 2: Ittoqqortoormiit eqqaani mittarfiliortoqassappat, Ittoqqortoormiiniit mittarfissamut aqqusineqarnissaanut aningaasalersornissaa qanoq pilersaaruteqarfigineqarpa?

Akissut: Ittoqqortoormiini mittarfiliortoqassappat, suliniummut atasutut aqqusinniortoqassasoq naatsorsuutigineqarpoq. Aqqusinniornissamut periarfissat arlaqartut, Rambøllip 2020-mi marsimi "Ittoqqortoormiini nutaamik mittarfiliornissamut periarfissat pillugit nalunaarusiaq"-aani atuarneqarsinnaavoq.

Periarfissat pillugit nalunaarusiami pineqartumi inuiaqatigiit aningaasaqarnerinut tunngatillugu naatsorsuinerit missiliuutini aallaaveqarput, naatsorsuinerinilu taakkunanani aqqusinniornissaq ilaatinneqarluni.

Apeqqut 3: Isumannaallisaarneq eqqarsaatigalugu qulimiguuleqarneq mittarfik piviusunngussappat qanoq pilersaaruteqarfigineqarpa?

Akissut: Qulimiguulimmit sullinneqarnissamik pisariaqartitsineq suliap ingerlanerani erseqqissarneqarlunilu qulaajarneqassagaluarpoq. Taamaakkaluartoq Ittoqqortoormiit Nerlerit Inaatalu akornanni timmisartuussineq ullumikkut kiffartuussinissami isumaqatigiissummik aallaaveqartumi pisariaqartinneqassanngilaq.

Apeqquut 4: Ittoqqortoormiit eqqaani mittarfiliortoqarnissaa pillugu aningaasalersuinissaq tamakkiisumik qanoq pilersaaruteqarfigineqarpa?

Akissut: Marlunnut avitamik aningaasaleeriaaseq sanaartornermut tunngatillugu aallaavigineqartartoq, mittarfimmut aningaasalersuinissami aallaavigineqassaaq. Imaappoq, pilersarusiortoqarnissaanut aningaasaliissutinik aallaqqaammut immikkoortitsisoqassaaq. Tassunga tunngatillugu ilassutitut aningaasaliissutinik Naalakkersuisut ukioq-manna qinnuteqassasut naatsorsuutigineqarpoq. Pilersarusiaq naammassisaq tunuliaqutaralugu, mittarfiliassap inaarutaasumik aningaasalersorneqarnissaa erseqqissarneqassaaq.

Apeqquut 5: Ittoqqortoormiit eqqaani mittarfiliornissaq tamakkiisumik qanoq akeqassangatinneqarpa?

Akissut: Apeqquutit ima paasivara, sanaartornermi tamakkisumik aningaasartuutissat apeqqutigigitit, taamaattumillu akissutinni tamanna aallaavigivara.

Rambøllip 2020-mi marsimi "Ittoqqortoormiini nutaamik mittarfiliornissamut periarfissat pillugit allaatigisaq"-ni atuarneqarsinnaavoq, 799 meterinik takitigisumik mittarfiliortoqassasoq innersuussutigigaat, tamannalu 269 mio. koruuninik akeqartussatut missilioraat. Asfaltigaanani 1.199 meterinik takitigisumik mittarfiliortoqassappat, 320 mio. koruuninik akeqassasoq missiliorpaat. Nalunaarusiami aamma atuarneqarsinnaasutut, sanaartornermi aningaasartuutissat missiliuutaammata, aningaasartuutivissaviit qanoq annertutigissanersut nalorninarpoq. Mittarfiliassaq pilersarusiorneqareerpat aatsaat, sanaartornermi tamakkiisumik aningaasartuutissat pillugit inaarutaasumik missiliuut paasinarsilluassaaq.

Neriuppunga qulaani allaqqasuni apeqquteqaatitit akineqartut.

Inussiarnersumik inuulluaqqusillunga


Mariane Paviassen